



Vjernici i iskušenja (Medina)

Hatib: dr. Abdullah ibn Abdurrahman el-Buajdžan

5. rebiul-ahir 1445. god. po Hidžri / 20. oktobar 2023.

Hvala Allahu, Gospodaru svjetova, Zaštitniku čestitih, Pomagaču vjernika, Spasitelju potlačenih i Onome Koji je odredio da lijepa završnica pripadne bogobojaznima. Svjedočim da nema boga osim Allaha, Jedinog, Koji nema druga, i svjedočim da je Muhammed, sallallahu alejhi ve sellem, Njegov rob i poslanik, koga je On poslao s uputom i istinitom vjerom da je uzdigne iznad svih vjera, makar to bilo krivo mnogobošcima, i makar bilo krivo nevjernicima, i makar bilo krivo zločincima.

Allahu moj, smiluj se, spasi i blagoslovi Svoga Poslanika, i njegovu čestitu porodicu i ashabe.

Bojte se Allaha onako kako Ga se treba bojati, ustegnite svoje duše od prohtjeva, obračunajte ih prije nego što budu polagale račun i budite svjesni Allahovog nadzora u tajnosti i javnosti.

“O vjernici, Allaha se bojte, i neka svaki čovjek gleda šta je za sutra pripremio i Allaha se bojte jer On dobro zna šta radite.” (El-Hašr, 18)

O muslimani! Islam je vjera ponosa, pobjede i postojanosti, i vjera milosti, pažnje i blagosti, i vjera istine, istinoljubivosti, pravednosti i čvrstog vjerovanja, i vjera sreće, spasa i uspjeha na oba svijeta, kojom je Allah zapečatio poslanice, derogirao prethodne vjere, i učinio je putem ponosa i uspjeha, ključem Dženneta i uzrokom sigurnosti, blagostanja i stabilnosti u životu na ovom svijetu.

Uzvišeni kaže: “Allah obećava da će one među vama koji budu vjerovali i dobra djela činili sigurno namjesnicima na Zemlji postaviti, kao što je postavio namjesnicima one prije njih, i da će im zacijelo vjeru njihovu učvrstiti, onu koju im On želi, i da će im sigurno strah sigurnošću zamijeniti; oni će se samo Meni klanjati, i neće druge Meni





ravnim smatrati. A oni koji i poslije toga budu nezahvalni – oni su pravi grešnici.”
(En-Nur, 55)

O muslimani! Uzvišenom Allahu sve se potčinjava, On svime upravlja, Njemu sve pripada, prije i poslije, i Njemu se sve vraća.

“U Njega su ključevi nebesa i Zemlje!” (Ez-Zumer, 63) Niko ne može promijeniti Njegove riječi, niti odbiti Njegovu odredbu, niti poništiti Njegovu presudu, a On je odredio da konačna pobjeda pripada Njegovoj vjeri i Njegovim evlijama: “Allah je zapisao: ‘Ja i poslanici Moji sigurno ćemo pobijediti!’ – Allah je, zaista, moćan i silan.”
(El-Mudžadela, 21)

Allah je obećao da će pomoći Svojim evlijama i dati im vlast na Zemlji, pa je rekao: “O vjernici, ako Allaha pomognete, i On će vama pomoći i korake vaše učvrstiti. A onima koji ne vjeruju – propast njima! On neće djela njihova prihvatiti.”
(Muhammed, 7–8)

“A Allah će sigurno pomoći one koji vjeru Njegovu pomažu – ta Allah je zaista moćan i silan.” (El-Hadždž, 40)

“A riječ Naša davno je rečena o robovima Našim, o poslanicima: ‘Oni će biti, doista, potpomognuti i vojska Naša zacijelo će pobijediti!’” (Es-Saffat, 171–173)

Allah je odredio da će biti poniženi i poraženi oni koji se bore protiv Njegove vjere. Uzvišeni kaže: “A koliko je bilo nevjerničkih sela i gradova koje smo uništili i poslije kojih smo druge narode podigli! I čim bi silu Našu osjetili, kud koji bi se iz njih razbježali. ‘Ne bježite, vratite se uživanjima vašim i domovima vašim, možda će vas neko što upitati.’ ‘Teško nama’, oni bi govorili, ‘mi smo, zaista, nevjernici bili!’ I kukali bi tako sve dok ih ne bismo učinili, kao žito požnjeveno, nepomičnim.” (El-Enbija, 11–15)

O vjernici! Allah iskušava vjernike kako bi ispitao njihov iman i očistio ih, a zatim im, u konačnici, daje lijepu završnicu. Uzvišeni kaže: “Misle li ljudi da će biti ostavljeni na miru ako kažu: ‘Mi vjerujemo!’ i da u iskušenje neće biti dovedeni? A Mi smo u





iskušenje dovodili i one prije njih, da bi Allah sigurno ukazao na one koji govore istinu i na one koji lažu." (El-Ankebut, 2–3)

"Allah neće vjernike s licemjerima izmiješane ostaviti, već će loše od dobrih odvojiti." (Alu Imran, 179)

"Svako živo biće smrt će okusiti! Mi vas stavljamo na kušnju i u zlu i u dobru i Nama ćete se vratiti." (El-Enbija, 35)

"Onaj Koji je dao smrt i život da bi iskušao koji će od vas bolje postupati; On je Silni, Onaj Koji prašta." (El-Mulk, 2)

Može se desiti da u iskušenju i sukobu između vjernika i nevjernika bude odgođena pomoć vjernicima, pa se time poveća nedaća, pojave se sumnje i očaj, a zatim dođe Allahova pomoć.

Uzvišeni kaže: "Zar vi mislite da ćete ući u Džennet, a još niste iskusili ono što su iskusili oni koji su prije vas bili i nestali? Njih su satirale neimaštine i bolest, i toliko su bili uznemiravani da bi i poslanik, i oni koji su s njim vjerovali – uzviknuli: 'Kada će već jednom Allahova pomoć!?' Eto, Allahova pomoć je zaista blizu!" (El-Bekara, 214)

"... da bi Allah ispitao ono što je u vašim grudima i da bi istražio ono što je u vašim srcima – a Allah zna svačije misli." (Alu Imran, 154)

Suhejb ibn Sinan, radijallahu anhu, prenosi da je Allahov Poslanik, sallallahu alejhi ve sellem, rekao: "Čudan li je primjer vjernika! U kakvoj se god situaciji nađe, on je na dobitku i takav slučaj nije ni s kim drugim osim s vjernikom: ako ga zadesi kakvo dobro, on zahvali Allahu i bude nagrađen zbog toga, a ako ga zadesi šta loše, on se strpi, pa mu i to donese nagradu od Allaha." (Muslim)

O ljudi! Sukob između imana i kufra jedan je od nepromjenjivih Allahovih zakona, a ti u Allahovim zakonima nećeš vidjeti odstupanja.





Uzvišeni kaže "Gospodar tvoj nije nikada nepravedno uništavao sela i gradove ako su stanovnici njihovi bili dobri. A da je Gospodar tvoj htio, sve bi ljude sljedbenicima jedne vjere učinio. Međutim, oni će se uvijek u vjerovanju razilaziti." (Hud, 118–119)

Još od praskozorja islama, njegovi neprijatelji čekaju "u zasjedi", pokušavaju mu nanijeti zlo na svakom mjestu, sklapaju saveze i udružuju se protiv njega, ali Allah je obećao da će čuvati Svoju vjeru i Svoje prijatelje – iskrene vjernike i da će uništiti Svoje neprijatelje.

Uzvišeni kaže: "Allah je htio da riječima Svojim istinu utvrdi i nevjernike u korijenju istrijebi, da istinu utvrdi i neistinu uništi, makar to ne bilo mnogobošcima po volji." (El-Enfal, 7–8)

O vjernici! Allah odgađa, ali ne zaboravlja, odgađa kaznu zulumčarima i sveti se za one kojima je učinjen zulum. "Zato nevjernicima još vremena dadni, još koji trenutak ih ostavi." (Et-Tarik, 17)

"I davat ću im vremena, obmana Moja doista je trajna." (El-A'raf, 183)

"... a Mene ostavi onima koji te u laž ugone, koji raskošno žive i daj im malo vremena; bit će u Nas, doista, okova i ognja, i jela koje u grlu zastaje, i patnje nesnosne." (El-Muzzemmil, 11–13)

Allah nekada odgađa kaznu nevjernicima iz samo Njemu znane mudrosti, a ne kao vid počasti prema njima ili iz zaborava.

Uzvišeni kaže: "A ti nikako ne misli da Allah ne motri na ono što rade nevjernici! On im samo pušta do Dana kada će im oči ostati otvorene, i kada će žureći uzdignutih glava, netremice gledati; a srca će im prazna biti. Ti opominji ljude Danom kada će im kazna doći, kada će oni koji su se ogriježili prema sebi – govoriti: 'Gospodaru naš, ostavi nas još samo kratko vrijeme, odazvaćemo se pozivu Tvome i slijedićemo poslanike!' 'A zar se prije niste zaklinjali da nećete na onaj svijet? I nastanili ste se bili u kućama onih koji su se prema sebi ogriježili, a bilo vam je poznato kako smo s njima postupili, i primjere smo vam navodili.' I oni lukavstva svoja pletu, a Allah zna za lukavstva njihova, samo što lukavstva njihova ne mogu brda pokrenuti. Nemoj ni





pomisliti da Allah neće održati obećanje Svoje poslanicima Svojim – Allah je, uistinu, silan i strog.” (Ibrahim, 42–47)

O vjernici! Imajte lijepo mišljenje o Allahu, držite se čvrsto svoje vjere, čuvajte svoje jedinstvo i budite kao jedna ruka protiv vašeg neprijatelja, molite Allaha da vas učvrsti u vašoj vjeri, izvršite svoje obaveze prema vjeri i prema ljudima, “i bojte se Allaha i znajte da ćete pred Njega stati. A ti obraduj prave vjernike!” (El-Bekara, 223)

Donosite salavate i selame, Allah vam se smilovao, na onoga na koga vam je Allah naredio da donosite salavate, rekavši: “Allah i meleki Njegovi blagosilju Vjerovjesnika. O vjernici, blagosiljajte ga i vi i šaljite mu pozdrav!” (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

